



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ბჟალავა იოსებ თეიმურაზის ძე

ბჟალავა იოსებ თეიმურაზის ძე (11. I. 1904, ძველი სენაკი, – 29. X. 1972, თბილისი), ფსიქოლოგი. მედ. მეცნ. დოქტორი (1945), პროფესორი (1946), საქართველ. მეცნ. დამს. მოღვაწე (1961).

განწყობის თეორიის ძირითად პრინციპებზე დამყარებით ბ-მ სათავე დაუდო ფსიქიკის პათოლოგიურ გამოვლენათა კვლევა-ძიებას და ამით საფუძველი ჩაუყარა საქართველოში ფსიქოლოგიის ერთ-ერთი დარგის – პათოფსიქოლოგიის ჩამოყალიბებასა და განვითარებას. გამოავლინა განწყობის აღმოცენების, ჩამოყალიბებისა და დინამიკის კანონზომიერებანი სხვადასხვა ფსიქიკური დაავადებისა და თავის ტვინის განსხვავებული კერების ლოკალური დაზიანების შემთხვევაში. ამ კვლევის შედეგად დ. უზნაძის მიერ შემუშავებული განწყობის კვლევის მეთოდები ფართოდ დაინერგა ფსიქიატრიულსა და ნევროლოგიურ კლინიკებში.

ბ-ს ზოგადფსიქოლ. კვლევის შედეგებს შორის აღსანიშნავია თანამიმდევრული პოზიტიური ხატის ექსპერ. კვლევის მონაცემები, რ-ებიც განწყობის ფსიქოლოგიის მნიშვნელოვან მონაპოვრადაა მიჩნეული.

ბ-მ მნიშვნელოვანი კვლევა ჩაატარა კიბერნეტიკისა და ფსიქოლოგიის მოსაზღვრე საკითხებზე. მისმა მონოგრაფიამ „კიბერნეტიკა და ფსიქოლოგია“ (1966) ფართო გამოხმარება პოვა თანამედროვე სამეცნ. წრეებში. იგი გამოქვეყნდა რუს. და პოლ. ენებზე.

თბმ.: შიზოფრენიის ფსიქოპათოლოგიისათვის, თბ., 1958; ფსიქოზურ განცდათა ფენომენოლოგია, თბ., 1968; ეპილეფსია, თბ., 1969; ცნობიერებისა და არაცნობიერი ფსიქიკურის პრობლემა განწყობის ფსიქოლოგიაში, თბ., 1976.

მ. საყვარელიძე
